

四庫全書

集部

# 欽定四庫全書

集部

御訂全金詩增補中州集卷六十七

詳校官中書<sub>臣</sub>張虎拜

主事銜<sub>臣</sub>徐以坤覆勘

總校官編修<sub>臣</sub>王燕緒

校對官編修<sub>臣</sub>勵守謙

謄錄監生<sub>臣</sub>黃嘉績

欽定四庫全書

御訂全金詩增補中州集卷六十七

元好問五

以下詩從  
全集補入

同希顏再登箕山

千年箕山祠蘿徑深以悄  
桂樹不復見禿荻餘秋篠  
盤盡絕頂石冢平木杪長  
風萬里來筋骸覺輕矯側  
身望巖竇解衣憩林表是  
時夏春交野色亂青縹川  
光乍明滅地脉互縈繞岡  
巒蟻垤出井邑蜂衙繞紅  
塵洛陽

昏白雲太行曉元功信冥漠一覺疑可了悟彼東山人  
胸中魯宜小

雜著五首

稟氣寡所諧衣食固無端所業在農桑甘以辭華軒田  
家豈不苦歲功聊可觀帶月荷鋤歸徘徊丘隴間曖曖  
遠人村紛紛飛鳥還養真衡茅下庶無異患干遙謝荷  
篠翁躬耕非所嘆

守拙歸田園淹留自無成長吟掩柴門遂與塵事冥素

月出東嶺夜景湛虛明  
揮杯勸孤影杯盡壺自傾  
遙遙望白雲千載有深情

榮叟老帶索原生決納屨  
邈哉此前修久而道彌著  
人生少至百每每多憂慮  
量力守故轍餘榮何足顧  
棲遲固多娛幾人得其趣

桃李羅堂前霜露榮悴之  
咄咄俗中惡人道每如茲  
冬嶺秀孤松卓然見高枝  
提壺撫寒柯懷此貞秀姿  
願留就君住終身與世辭

世短意恒多時駛不可追感彼栢下人泣然沾我衣運  
至會歸盡彼此更共之理也可奈何一觴聊可揮酒中  
有深味情隨萬化遺西南望崑墟靈人侍丹池我無騰  
化術帝鄉不可期且極今朝樂千載非所知

潁谷封人廟

洩洩潁谷雲融融潁川水封君去我久水雲自清美人  
言君善諫微意得鄭子特於悔悟時一語發天理大孝  
動天地直及頑鄙反身而未誠善諫且敗矣如何千

歲下乃與茅焦比我行潁川道永念負甘旨願作潁尾  
魴因之日千里

贈答劉御史卿雲三首

舊聞劉君公學經發源深驂騑萬里氣聖途已駸駸大  
梁語三日副我夙所欽濂溪無北流此道日西沉百年  
斗山木不復秀穹林南風雖寥寥聞絃猶賞音獨憐夸  
毗子一我無古今共學君所貪適道我豈任相酬無別  
物徒有好賢心

阿京吾所畏早生號能文初無王家癖聲光自流聞此  
行不虛來得接大小君信知珠玉淵足當羔鴈羣君家  
有箕裘聖學待策勲但使本根在枝葉復何云殷勤五  
色筆未用推千軍

老鶴何許來澹與孤雲同相值太虛室悠然復西東聖  
學要深談惜君別匆匆何時沂水上同詠舞雩風

送欽叔內翰并寄劉達卿郎中白文舉編修三首  
忽忽歲云暮烈烈風霜威舉頭望長安游子從此歸我



有平生懷愛君如連枝半年姜肱被所樂良不貲尚恨  
人事異離合無定時送君酒一杯侑以彈鋏辭上言行  
路難下言長相思

六月渡盟津十月行汜水風濤脫沉舟水雪危墮指孝  
子在中野永念負甘旨家貧親已老形瘵心欲死古稱  
季路孝負米曾百里願作鯉與魴寧當怨鰥尾君歸不

可緩獻壽迫歲始遙知慈母心已為烏鵲喜  
一年不製衣春服犯霜風一日僅兩食腸胃不得充生

平萬里氣頓入低回中田夫怒攘臂縮首甘盲聾老兵  
賜顏色歡喜無所容求索厭朋友勞苦慚僕僮無聊復  
無聊又復招災凶我有一樽酒澆君魄磊胸君年始三  
十白髮成一翁顧以寸心微受此百慮攻君窮復何辭  
不見閒閒公文章二百年不救四壁空

德禪師清涼草堂

舊隱伊陸巷把茅入宴息新居蘭若峯老屋補漏坼鐘  
魚有勝氣餅錫無滯迹回頭仙人隊談笑初未隔結草

幾成壤逆旅誰主客道人那計許一笑山月白多生負  
詩債秋物苦催索遙知得新句崧少為動色

上人舊隱  
伊陽伊陽

有伊陸巷仙人隊  
者女儿山諸峯名

### 北邙

驅馬北邙原踟躕重踟躕千年富貴人零落此山隅萬  
塚不復識榛莽餘龜趺賢愚同一盡感極增悲歔粵人  
惟物靈生也與道俱一為物所眩遂爾迷厥初蛻骨幾  
山丘百年不須臾歸盡固其理交喪亦已愚陳迹有足

悲奈此萬化途焉知原上塚不有當年吾

龍門雜詩

不見木菴師胸中滿泥塵西窓一握手大笑傾冠巾青  
山有佳招一游負因循老筇動高興萬景森前陳乾元  
先有期清伊亦知津細看潛溪樹高臥香山雲學詩二  
十年鈍筆死不神乞靈白少傅佳句儻能新遙遙洛陽  
城梅花千樹春山中有忙事寄謝城中人

示姪孫伯安

伯安入學小穎悟非凡兒屬句有夙性說字驚老師見  
汝挾書歸憶我青衿時青衿昨日耳齒髮忽如茲讀書  
悞人多濶疎亦天資元無倚天劍可斷扶桑枝倚梯望  
青冥愚者知笑之壯事已無取老謀欲何施幸此掌中  
孫未染如素絲就令好紙筆門戶誰當支我有商餘田  
汝壯可耘耔便當學種樹未用城南詩

伯安方讀韓集  
符讀書城南

### 種松

百錢買松栽植之我東墻汲井浣塵土插籬護牛羊一

日三摩挲愛比添丁郎昨宵入我夢忽然變昂藏昂藏  
上雲霄慘澹含風霜起來月中看細鬣攢針芒惘然一  
太息何年起明堂鄰叟向我言種木本易長不見河畔  
柳顧盼百尺強君自作遠計今日何所望

虞鄉麻長官成趣園二首

鑿池水交流築屋山四繞衡門在人境三徑深以悄中  
庭八九樹晨坐聽百鳥人生信多慮長寢容未了虛舟  
有天遊我定物自擾豈不與世竝自是萬物表達觀無

不可言外當意曉

蹉跎匡山游爛漫彭澤酒慨然千載上懷我平生友夫  
君負奇節斂氣鬱星斗為吏非所堪徑去如避走王官  
唐以還寂寞蓋已久柴車君來隱清風動林藪至今溪  
上詩往往在人口淵明不可作此士寧復有

雜詩四首

相士如相馬滅沒深天機區區銅馬法徒識牝與驪人  
言當塗公惡人知其微如何許劭語受之不復疑知人

固不易人亦未易知嫵妍在水鏡鉛粉徒自欺孰為仁  
義人未假已不歸伯樂不可作思與曹瞞期

世事如大弩人若材官然乘勢易發機非時勞控弦又  
如大水中置彼萬斛船雖有帆與櫓亦須風動天不見  
周公瑾弱齡已飛騫不見師尚父鷹揚在華顛彼非生  
而材此宜晚乃賢鎡基喻智慧要必有待焉嘆息狂馳  
予嘗為愚者憐

崑山有璞玉外質而內美唯其不自衒故與頑石齒和



也速於售再獻甘減趾在玉庸何傷惜君兩足耳

堂堂明堂柱根節幾歲寒使與蒲柳同扶厦良亦難我  
衣敝緼袍我飯苜蓿盤天公方試我劍缺勿妄彈

### 采杞

仙苗不擇地榛莽散秋實微霜綠未隕濃露紅欲滴方  
書尚服餌僮僕課采拾花葉久已厭功實從此得苦茶  
薦奇味凡醞化靈液人傳東坡事世驗西河術誑口亦  
自佳輕骨況可必維物多似是致用相萬一向非觀玉

篇誰為分杞棘

宿菊潭

田父立馬前來赴長官期父老且勿往問汝我所疑民  
事古所難令才又非宜到官已三月惠利無毫釐汝鄉  
之單貧寧為豪右欺聚訟幾何人健鬪復是誰官人一  
耳目百里安能知東州長官清白晝下村稀我雖禁吏  
出將無夜叩扉教汝子若孫努力逃寒饑軍租星火急  
期會切莫違期會不可違鞭扑傷汝肌傷肌尚可天

閑令人悲

阻雨張主簿草堂

溼暑雲氣鬱漫溼

去聲

成積雨南風竊陰機萬籟因掀舉

飛濤限江岸懸流迫茅宇塊坐百慮滋歸興生鳥羽兒  
童十日約竹馬候門廡曾是百里程川途忽遐阻少遊  
去我久念子平生語歎段劣可乘羸餘果何取河汾敝  
廬在坐滯西南楚世事不可期客心徒自苦

萬化如大路

萬化如大路物我適相遭往來限隣屋夢寐阻同袍斷  
金幾何人年運劇銷膏相歡顧不足爾戈奚暇操古來  
泰山名達觀等秋毫蠻觸徒能國螺贏竟誰豪曠蕩覽  
八紘美惡自為曹造物無巧擇大塊有并包暴公今在  
無寒燐起蓬蒿孤心既悄悄衆口益嗷嗷同塵寧當悔  
枉已乃為勞鹿門有高躅世網儻能逃

李道人松陽歸隱圖

北山范寬筆老硬無妍姿南山小平遠澹若韋郎詩松

陽古仙村佳處我所知長林連玉華細路入清微連延  
百餘家柴門水之涓桑麻蔽朝日鷄犬通垣籬媿我出  
山來京塵滿山衣春風四十日夢與孤雲飛可笑李山  
人嗜好世所稀逢人覓詩句不恤怒與譏道人本無事  
何苦塵中為京師不易居我癡君更癡山中酒應熟幾  
日是歸期

學東坡移居二首

廢地三畝餘十年長蒿萊瓦礫雜糞壤白骨深蒼苔孤

客無所投卽此營茅齋墾斷豈不苦寢處亦可懷辱身  
賤者事寧當惜筋骸伐木荒林中運甕古城隈辛勤八  
十日吾事乃得諧買宅必萬錢一錢不天來今晨見此  
屋一笑心頗開

東坡謫黃州符藥行江湖荒田拾瓦礫賤役分僮奴我  
讀移居篇感激為悲歔九原如可作從公把犁鉏我貧  
公亦貧賦分無賢愚論人雖甚媿詩亦豈不如

歷下亭懷古分韻得南字

東秦富佳境北渚擅名談茲游亦已久纔得了二三南  
山壓城頭十里奎與函狀流出地底城隅滿泓潭金絲  
弄晴光玉玦響空嵌清漣通畫舫秀水深雲龕華峰水  
中央鬱鬱堆煙嵐荷華望不極綠淨紛紅酣毒熱非山  
陽卑濕無江南承平十萬戶他州隔仙凡劫火土一丘  
樹老草不芟巧盡露天質到眼皆奇探千年歷下亭規  
模見軍軍懷賢成獨詠勝賞何由參

舜泉效遠祖道州府君體

重華初側陋嘗耕歷山田至今歷下城有此東西泉喪

亂二十載祠宇為灰煙兩泉廢不治

平

漸著瓦礫填蛙

跳

平

聚浮沫羊飲留餘羶我行歷荒基涕下何連連舜

不一井庇下者何有焉帝功福萬世帝澤潤八埏要與

天地竝寧待一水傳甘棠思召伯自是古所然我欲操

畚鍤浚水及其源再令泥濁地一變清泠淵青石壘四周

千祀牢且堅石渠漱清溜日聽薰風絃便為泉上叟

杯飲終殘年



與張仲傑郎中論文

文章出苦心誰以苦心為正有苦心人舉世幾人知工  
文與工詩大似國手碁國手雖漫應一著存一機不從  
着着看平何異管中窺丈須字字作亦要字字讀咀嚼  
有餘味百過良未足功夫到方圓言語通卷屬只許曠  
與夔聞絃知雅曲今人誦文字十行誇一目開顛失香  
臭昏視紛紅綠毫釐不相照覲面楚與蜀莫訝荆山前  
時聞別人哭

銅鞮次村道中

山徑一何惡一澗復一嶺昂頭一握天放脚百丈井武  
鄉有便道故遶銅鞮境涉險良獨難又復觸隆景羸驂  
蹄已穴怨僕氣將癭與世恒背馳用力何自省河汾紹  
絕業疑信紛莫整銘石出壙中昧者宜少警少時曾一  
讀過眼不再省南北二十年夢寐猶耿耿喻如萬里別  
燈火得對影行役豈不勞聊當忍俄頃

蕭齋

并引

故民部長陵蕭公泰和大安之間名德雅望朝臣無  
出其右其為太原道漕使時不肖方廁諸生間顧嘗  
一望眉宇以為甚幸然亦以齒少且賤不得與橫經  
之末而為恨也北渡後居陽平見關中人邢公達談  
公平生往往色揚而神躍問之知其為公夫人之猶  
子也蓋公達之先人於公恩義良厚而公所以報之  
者為甚力公達初仕部掾年甫三十遂為州上佐出  
入臺閣者二十年雖其材致然亦藉公為之司命耳

予雅知公達之敬公也凡欲聞公之故則就訪之公達以所居之室乞名於予因以蕭齋目之且為之說云士之生世有一鄉之士有天下之士有一人之所私慕有天下之所共稱分限所在不能以強人而人亦不得而強之也惟公承王公餘烈奕葉台鼎世譜完具與當楊杜氏相上下故言氏族者推其貴出入經史優柔厭飫發擿祕奧不減前輩蔡無可故言討論者服其博奏讞疑獄致力忠愛一言之仁利及永久

故言斷獄者歸其平彊禦不奪其操公相不易其介  
幅巾鄉社坐鎮頽俗故言進退者推其高蓋天下所  
共稱非一人之私慕高山仰止其誰曰不然古人有  
愛蕭子雲筆札者得蕭之一字遂以名所居況於其  
所天乎因為詩以貽公達有好賢如緇衣者請為同  
賦焉

十年金門客一日蓬蒿人煙煤兩椽屋因公名字新昔  
公無恙時四海望經綸敦龐一古儒風采自名臣人亡

典刑在百世留清塵師尊世共然況予夙所親愛公入  
夢想逶迤見垂紳教兒多讀書公言諒諄諄他時門戶  
改亦惟公所姻我嘗望公顏道左避朱輪至今誦其詩  
喜色為津津歸秦如未老會買東家隣

別李周卿一首

風雅久不作日覺元氣死詩中柱天手功自斷鼇始古  
詩十九首建安六七子中間陶與謝下逮韋柳止詩人  
玉為骨往往墮塵滓衣冠語俳優正可作婢使望君清

廟瑟一洗箏笛耳

訓韓德華送歸之作

良朋滿東州歲月見忠悃韓侯晚相值意氣尤懇懇我  
嘗相斯人趣向識端本立節栢有心樹德蘭在畹官榮  
睨不顧寄興淨雲巘今世走名場旆旆幾仆偃賤子本  
無取玉趾渠往返昨聞遂歸養見謂竹林阮暑塗三百  
里追送不憚遠觀君木訥姿百念為日損顧方慙衣絢  
又被以華袞桑榆倘可收歲事在穠蓂里門眼中見歸

袖勞重挽鷄黍先有期升堂未言晚

戊戌十月山陽雨夜二首

朔吹作還止雲意鬱以周十月雷收聲陽和自油油此  
雨非舊雨春旱歷夏秋道路土三尺今朝見浮漚山城  
信樂土凶年未消憂一蝗食禾盡半菽不易求流民四  
方來斷港魚鰕稠忍死待一麥秋種且未投乾溢誰所  
司零壇徧九州醉飽到狐鬼巫覡自懷羞帝命制江湖  
野語良悠悠龍公為汝賀桑榆定可收



霏霏散浮煙，靄靄集微空。出門望白塔，但覺襟袖潤繁  
聲。忽赴節細點，復成陣久渴。疑未厭，平已作寧小靳山。  
陽冬候，煖麥脚易滋。分去土膏入滲漉，破粒容可趁。此  
邦信可樂，風土同三晉。單車我東來，塵土滿歸鬢。裹糧  
失先具，閑糴困餘吞。今朝人事改，一雨開百順。僧窓晚  
色淨，喜極夢為盡。枕上一詩成，燈花落紅燼。

### 看山

慘慘悲去國，鬱鬱賦卜居。不采西山薇，即當葬江魚。今

日忽有得蕩如脫囚拘青山坐終日忘讀案上書臯壤  
與山林使我欣然歟我身天地間託宿真蘧廬無窮閱  
有限萬期亦須臾坎止及流行何計疾與徐百年險與  
夷又似萬里途良馭馳康莊九折亦推車必惟易之就  
遇險當何如化化復生生體異理不殊鷺非浴而白烏  
豈黔而烏誰續長脰鶴誰截短足鳬孔墨不煖席盜跖  
華堂居公車困方朔太倉飽侏儒杜子露雙肘朝參出  
無驢軟裘與快馬照耀與臺軀天隨隱笠澤杞菊供盤

孟擊鮮日為具大嚼皆屠沽乖逢自乖逢賦分無賢愚  
作計窮一我造物良區區嚮也憂不足乃今樂有餘

九日讀書山用陶詩露淒暄風息氣清天曠明為  
韻賦四首

今日復何日霜氣修已淒登高有佳招山中古招提翩  
翩劉公子玉田重相攜乾坤動詩興澗壑忘攀躋霍侯  
家甚貧劣有酒與鷄城居厭輦鼓移家此幽棲世網不  
易逃所向皆塵泥何以濯我纓林間有清溪

霜氣一偃薄杳杳秋山空臨高望烟樹黃落雜青紅造  
物故豪縱窮秋變春容錦障三百里不盡臺山東燦燦  
黃金華羅生蒿艾叢野人不知貴幽香散秋風秋物自  
橫陳顧揖苦不供誰能搖醉筆吐句凌清雄

賞心古難并暮景日易費故人成此游樽酒重相慰新  
詩互酬唱清談見滋味鯉鯢方偃蹇鼃黽共騰沸懸險  
劇褒斜清渾雜涇渭爭教十圓腹滿貯憂與畏情親到  
真率寧復轉嘆諱鄭重伯雅生藉汝聊吐氣

紫微老仙伯少日見承平甲子五百餘雙瞳益清明披  
莊不盈尺脩然澹無營庭柯挂秋蔬老樹風泠泠我有  
年德尊公深鄉曲情思得菊潭酒為公制頽齡作詩語  
同游明年復尋盟看翁九節杖翩翩上崢嶸

留月軒

丈室何所有琴一書數冊花竹結四隣繁陰散芳澤閒  
門無車馬明月即佳客三人成邂逅又復得驪伯驪伯  
屬我歌蟾兔為動色商聲隱金石桂樹風索索乾坤月

與我光滅即生魄元精貫當中寧有天壤隔卯君尚奚  
待言論累數百多談令人厭坐睡墮驚憤一笑鷄未鳴  
虛窓自生白

趙吉甫西園

園名  
種德

王城比民居近市無閒田閒田八九畝乃在城西偏久  
矣瓦礫場莽為狐兔阡高人一留顧老木生雲烟築屋  
臨清流開窓見西山人境偶相值遂無城市喧趙侯嗜  
讀書兀坐守遺編性情入吟咏古澹無妖妍酸鹹與世

殊至味久乃全我作別墅詩請為子孫傳耕耘有定業  
歎豐屬之天寧作鹵莽兒袖手待逢年汲古先有齋種  
德今有園期君在晚歲無庸計目前

臨汾李氏任運堂二首

并序

彥仁從軍久厭於事物之累念欲脫去之而不可得  
也故嘗鬱鬱不自聊求子發藥之子名其居曰任運  
且為賦詩

官職有何好凜凜蹈危機車塵及馬足捧手仍低眉棄

去何足道無從脫繫維不如聽其然歲晚倘可期此心  
未馴初養虎時飽饑一為金石止坐閱萬物馳汨泥揚  
其波哺糟歌其醕漁父我所學靈均竟奚為上堂壽慈  
親兄弟如埧簾菽水致足樂況有甘與肥人生天地間  
長路有險夷遇險即欲避安得皆通達君家北山翁百  
世留清規樂天而知命行矣君何疑

北山翁彥仁之伯祖泰和問以高道

提點天長胥華公贈詩有  
百世清規之語故及之

履危恨無機避禍欣有策後慮徒自密前路寧汝測七



戰歿牖下坐談得刺客周身容孔智伐木不宋厄九折  
怯乘險瘴海悲遠謫就令家長安獨不死牀簀人生多  
憂畏年壽幾至百惴惴首尾間天宇坐成窄重泉青雲  
梯平地黃土陌乖逢有定在拙計徒巧擇行樂當及時

莫待頭雪白

黃土陌見初學記奴僕門

曲阜紀行十首

荒城臥魯甸寒日澹平蕪千年素王宮突兀此城隅我  
昔入小學首讀仲尼居百讀百不曉但有唾成珠少長

授魯論稍與義理俱攝齊念升堂壞壁想藏書翩翩七  
十子佩服見舒徐慨然望闕里日思膏吾車五原東北  
晉因循迫桑榆今日復何日南冠預庭趨隱隱金石聲  
恍如夢清都偉哉神明觀欣幸當何如

殿屋劫火餘瓦礫埋荒基入門拜壇下儼然想光儀憶  
當講授初佩服何逶迤登降幾何人鸞鳳相追隨千年  
仰階級天險不可躋丈杏誰此栽世世傳清規植根得  
所託在木將何知

堂堂魯三檜培植出天巧規模欲十抱奇秀供百繞誰  
言甲戌亂煨燼入炎燎青烟千雲上羣鶴空自矯哀哀  
嶧陽人腸肺痛如攪魯郊木何限此樹實所少神明信  
扶持厄運豈易曉雩臺滿荒榛遶宮餘曲沼紛紛闕成  
壞何異晏與早道存有汙隆物齊無壽夭霜皮眼中見  
鬱鬱自塵表君看泰山石萬古青未了

陋巷陋復陋老屋在人境門前軒蓋多閉戶自幽屏近  
郊無百畝負郭纔半頃饘粥聊自供取足唯一井此井

閱千歲清節傳箕穎尚想瓢飲初至味久益永德隣與  
周旋聖域容造請貧中有此樂日暮獨何恓泓然窺古  
甕一勺試甘冷上池果能神轉盼得深省塵埃竟何有  
素髮忽垂領共學誰我容從之抱修綆

泮宮何所有舞雩但荒臺泮水涸已久北風捲黃埃顧  
瞻魯公宮感極令人哀獻馘亦盛事規摹到平淮作計  
萬萬古而今安在哉獨愛鼓瑟翁不與三子偕宗周方  
訖錄聖師猶卷懷但欲春服成風乎詠歸來我亦淡蕩

人涉世寡所諧浴沂行有日一笑心顏開

大姦何所如狻猊雄且猛雖然弭耳伏擇肉會一騁卯  
也不敗露名與聖師竝天刑竟莫逃不待七日頃曹瞞  
盜漢璽僅得保要領與卯均小人脫網乃差幸小偷學  
不至適足污鍤鼎不從市朝肆必就遠方屏兩觀餘坡  
阨萬世示頑穢神兵凜可怖過者宜少微

不見講堂處指似存世譜遺基洙泗間荒惡餘十畝聖  
師既已老自衛歸在魯正樂修六經卒業此其所當時

季路室完整逮建武太僕忠且壯持用方禦侮如何盛  
唐日一廢不重舉中和天地位寧復俟庭廡所嗟世道  
衰師授日莽鹵空餘千歲井黠黑照終古

白塔表佛屋萬瓦青青粼粼何年勝果寺西與姬公鄰塔  
廟恣汝為豈合魯城闌魯人感異教吾道宜湮淪許行  
學神農耒耜手自親當時子孟子直以為匪民況彼桑  
門家糞壤待其身一朝斷生化萬國隨荆榛孟氏非所  
期安得揚與荀丹青贊神化舊染為一新坐令鐘魚地

再睹籩豆陳吾謀未及用勿謂秦無人

天地有至丈六籍留聖謨聖師極善誘小智祇自愚丈  
章何物扶不直咳唾餘操戈競虛名望塵拜高車所得  
不毫髮咎責滿八區公論懸日星豈直小人儒喻彼失  
相者俛不知所如指南一授轡聖門有修途陽光照薄  
暮尚堪補東隅悠哉發深省灑埽今其初

林墓連魯城方廣十里間林間百草具棘刺死不蕃楷槐作  
橫理青青閱千年懷人成一慨何止召公賢博陵石翁

媼名字無留鐫兩獸墓前物歲久乃訛傳昨我游魯  
門規作孔林篇聖人與天大聖道難為言所見不一  
記來者何述焉詩成私自媿小子良斐然

岳祠齋宮夜宿

煌煌德寧宮望秩年祀永唐來幾焚蕩規制仍峻整龍  
旂嚴黼座金罍散光炯嶽拜行且周偉觀竊欣幸青紅  
留壞壁兵衛自馳騁木杪見龜趺雄筆映鐘鼎中和昔  
喪亂已溺寧再拯有來鴈門公赤手探虎鯁經營入慘



淡灑落出鋒穎凶豎竟自推神鑒益彪炳青山閱人代  
今古一炊頃摩挲盤根槐甲子誰記省謁來石門道煙  
岫接雲嶺霄漢瞻上階濃碧插秋影青林雨聲集懸瀑  
激奔猛森然心魄動冰雪淒以耿飄飄想仙袂飛下玉  
蓮井昨夢知是非復此造真境妙香淨餘習灝氣發新  
警鶴書來何遲素髮迫垂領玄壇展衰步似欲逐幽屏  
高柯月紛紛徘徊惜清景

示程孫四首

并州望南宮東南千里餘六年念兒女鬱鬱心不舒程  
孫問安否一月兩寄書老我倦出門況是涉畏途鞍馬  
二十日面色為焦枯白兄應見笑此行亦區區

吾女在吾家先已安卑弱雖然適貴門一味甘儉薄財  
廉出仁讓語省見端慙婦道化一州母女皆願學州人  
聞我至相與喜且愕謂我六十翁齒髮未衰落擊鮮日  
為具和氣動城郭為說壻女賢宅相知有託乃公私有  
賀一月醉杯杓生女四十年今有為父樂

直孫年志學玉立無纖瑕簡孫甫勝衣芳蘭茁其芽  
燦彩翠翔鵷雛映朝霞諸孫獻公壽喜極復長嗟吾母  
河南君閨門靜無譁殷勤教女孫乃今成汝家老我何  
足道外舍儘得誇

會聚樂不貲言別悽以惻風雲動老懷車馬見行色  
明年吾六十家事斷關白唯當近酒醅亦復拋書冊提攜  
兩童子欸段或下澤玉雪念吾孫未覺千里隔乘興徑  
一來髯壻當速客

九月初霖雨中感寒痺作

留飲工作祟臂股半風淫風淫喜陽景旬決坐秋霖兒  
寒益跳梁衰暮苦難任病枕怯遙夜破窓風露深兩年  
魏大名千門響霜碁客行足繒纈家居但疎衾絢絲不  
易得候蟲徒自吟無衣思南州傷哉非獨今

贈鵬

鄰牆擁高樹深樾蔭衡宇山禽十百種晨夕所棲處獨  
愛黃栗留姪姪如稚女笑啼啼又笑宛轉工媚嫵低窺

疑欲下轉盼忽驚舉花暗柳陰陰尚記兒時語詩家此  
尤物名字喧樂府天真累絲竹容服仍楚楚宮額畫眉  
濶黛黑抹金縷恨不掌上看毛羽得細數山城無與樂  
好鳥亦求侶時時持貫珠來有唱當和汝

讀書山月夕二首

層崖多古木細路深莓苔柴門開曉日雲際青山來靜  
中有真趣孤賞何悠哉

久旱雨亦好旣雨晴亦佳繩牀對明月樹影含清華墻

東有洿池歌枕聽鳴蛙

繼愚軒和党承旨雪詩二首

南來何所如孤根轉風蓬以彼萬里途寄此一畝宮明  
窓一繩牀稍覺紛華空唯餘作詩癖尚與當年同人言  
詩窮人無詩吾自窮此世等夢耳誰窮復誰通茹噎當  
快吐聊此寬吾胸

老麻臥雲壑澗松上崢嶸斯文要棟梁頽圯可力撐匠  
石殊未來破屋燈青熒乾坤有二鳥一息當一鳴區區

用舍間而亦隨重輕百挽迹莫前一怒怨已盈臨風三  
太息此意何時平

郎丈炳心遠齋二首

茅齋迫官居塵土日蓬勃道人掩關坐挂眼無外物明  
窓一蒲團濯足晨理髮一片萬古心清潭兩明月

止性如止水惜身如惜玉婦姑得相安久矣脫羈束兒  
童挾書至燈花催夜讀自是周太常生平耐幽獨

蕭寺僧歸橫軸

山空秋草寒露暗光已夕悠悠松門月靜照禪客入遙  
知夜堂深疎鐘動幽寂

祁陽劉器之以墨竹得名今年春薄游鹿泉因為  
予寫真重以小景見餉凡以求予詩而已賦二十  
韻答之

去國二十年跬步即異境中間歷齊晉陡下如墮井輒  
涸困波神祠廢卧土梗垂翅附危柯饑腹得畫餅阜樾  
竝牛驥泥淖開蛙黽紛紛疲應接碌碌陪造請尚賴麴



生賢真味留雋永嗟跼鐘鼎意盡付銅尾秉劉生工寫  
照游戲出俄頃高懸大圓鏡寫我神形影青衿昨日爾  
素髮忽垂領詩餘飯山瘦智縮武庫瘿霄漢邈南宮寂  
寂媿鄧耿包虎錦衾爛薛鶴霜毛整鼠目與麀頭何堪  
污毛穎厚貺久未報重以大年景藪篠點棲禽樹石帶  
烟暝知君深意在勸我事幽屏衡茅方卜築亦復謀二  
頃封龍有佳招因之發深省

答王輔之

我宅西山隅君居潁之濱昨朝與君語

或作語

憶我山中

春君家縣豪傑交結通周秦四海盧御史肯來作師賓  
風流被諸郎文質猶彬彬乃知父兄意潤屋亦潤身喪  
亂幾何時孤身走跋跋貂裘風霜老獨有佳句新被褐  
懷珠玉知君未全貧我詩初不工研磨出艱辛雖欲尸  
祝之芻狗難重陳顧方媿盈川況敢同照隣汾流清復  
清堪君濯纓塵居人與行客早晚期相親

寄題沁州韓君錫耕讀軒

束帶見督郵甘以辭華軒嘯傲南窓下且樂我所然斜  
川今在亡問津有遺編行尋柴桑里遂得桃花源桃源  
無漢魏況復義熙前讀書與躬耕兀兀送殘年淵明不  
可作尚友乃為賢田家豈不苦歲功聊可觀讀書有何  
味有味不可言遙知一樽酒琴在已無絃

虞坂行

丙子夏五月將南渡河  
道出虞坂有感而作

虞坂盤盤上青石石上車蹤深一尺當時騏驥知奈何  
千古英雄淚橫臆龍蟠於泥易所歎麟非其時聖為泣

玄龜竟墮余且網老鳳常饑竹花實天生神物似有意  
驗以乖逢知未必若論美好是不祥正使不逢何足惜  
孫陽騏驎不並世百萬億中時有一乃知此物非不逢  
轅下一鳴人已識我行坂路多閱馬敢謂羣空如冀北  
孫陽已矣誰汝知努力鹽車莫稱屈

畫馬為邢將軍賦

大宛城下戰骨滿駑駘入漢龍種藏將軍此紙何處得  
便覺房駟無光芒人中馬中兩勍敵天門鴈門皆戰場

并州父老應相望早晚旌旗上太行

送郝講師任崇福官

郝平  
晉人

大方之家幾知津郝君七十老斲輪書丈五車喙三尺  
劇談混沌今猶神太玄博士為絕倒君言誇矣天公嗔  
長安冠蓋羅青雲洛陽車馬爭紅塵怪君掉頭不肯住  
寂寞來作由東隣崧高維岳古所秩三十六帝有外臣  
玄都石壇待飈馭宮殿突兀松輪囷上界仙人鄧雲山  
洞天治所名司真蓬萊方丈去不遠明星玉女時相親

瑤華可擷蘭可紉烟霞永隔塵中人黃鶴一去不復返  
白鷗萬里誰能馴為我殷勤謝鄧公玉華歲晚當平分

赤壁圖

馬蹄一蹴荆門空鼓聲怒與江流東曹瞞老去不解事  
誤認孫郎作阿琮孫郎矯矯人中龍顧盼叱咤生雲風  
疾雷破山出大火旗幟北捲天為紅至今圖畫見赤壁  
髣髴燒迹留餘蹤令人長憶眉山公載酒夜俯馮夷宮  
事殊興極憂思集天濤雲閒今古同得意江山在眼中

凡今誰是出羣雄可憐當日周公瑾顛顛黃州一禿翁  
愚軒為趙宜之賦

心生心化誰搏控舉世倏倏皆大夢百年只辦作朝三  
爭識羣狙先汝弄人人具此清淨眼妄翳無根嗟自種  
天機嗜欲涇渭雜道念紛華鄒魯關令人却羨愚軒愚  
一蹴藩籬開廓空愚軒虛室久生白掌上清真元自洞  
氣筵神火具長物豈有古方傳魯宋人言此眼本無負  
死恨冥行人所共智愚何預阿堵中或者桔槔賢抱瓮

病瘡能指跛能履眉睫雖存寧復動我云俗士蔽一曲  
全笑不全從古衆渠儂六鑿日相攘內不錙銖徒外重  
守宮綠壁夸覆射懸蟲如輪規命中天和一洩不知止  
膏火自焚良可痛從教目比方相多纔與瞽師論伯仲  
先生真是有道者老境一愚聊自送五官止廢而神行  
就令有眼將無用寄謝諸方五味禪葛藤莫作金鏡頌

西窓

西窓鳥聲千種好樹陰離離動微風青山滿前掩書坐



欲話懷抱無人同花枝不笑綠鬢改樽酒自與黃金空  
少年樂事總消歇落日澹澹天無窮

聞欽叔在華下

翰林僊人詩酒豪平生嵇阮參遊遨山中草棘滿霜雪  
可惜渠家宮錦袍聞君忍饑讀離騷思之不見心為勞  
舉頭西望忽大笑太華落落落長庚高

女几山避兵送李長源歸關中

山骨稜稜雪花白北風不貸單衣客與君此別欲何言

若箇男兒不湮阨相濡相啣尚可活轆釜何曾厭求索  
從知鮫鱷無隱鱗芥視三山需一擘自古饑腸出奇策  
漢廷諸公必動色見君軒蓋長安陌

雪後招隣舍王贊子襄飲

去年春早百日強小麥半熟雨作霜青山無情不留客  
單衣北風官路長遺山山人仗倆拙食貧口衆留他鄉  
五車載書不堪煮兩都覓官自取忙無端學術與時背  
如瞽失相徒倭倭今年得田昆水陽積年勞苦似欲償

隣牆有竹山更好下田宜秫稻亦良已開長溝掩烏芋  
稍學老圃分紅薑宋公能詩雅好客勸我移家來水傍  
一閒入手豈易得夢中我馬猶玄黃君不見并州少年  
作軒昂鷄鳴起舞望八荒夜如何其夜未央賣刀買犢  
未厭早腰金騎鶴非所望河南冬來已三白土膏墳起  
如蜂房崧山東頭玉旆出父老知是豐年祥南溪酒熟  
梅花香高聲為喚牆東王便當過我取一醉聽歌長安

金鳳凰

鄰舍宋可字予之隱君子也并州少年謂李汾長源長安金鳳凰者齊梁間田舍兒所歌

牛山亭招仲梁飲

孤城鬱鬱山四周外人乍到如繫囚  
牛山亭前浙江水只可與君消百憂  
江山百年有此客雲樹六月生涼秋  
世上紅塵爭白日一丘一壑去來休

巨然松吟萬壑圖

胸中刺鯁無九澤畫裏風烟纔一漚  
阿師定有維摩手斷取江山着筆頭  
石林蒼蒼崖寺古銀河浩浩松聲秋  
方外賞音誰具眼莫將輕比李營丘

太白獨酌圖

宣和所藏  
李伯時筆

謫仙去世三百年海中鯨魚渺翩翩  
豈知龍眠天馬意忽有玉樹秋風前  
金鑾歸來身散仙世事悠悠白髮邊  
會稽父老何處在千里名山入酒船  
清景已隨詩句盡風流合向畫圖傳  
往時長安酒家眠焦遂不狂張不顛  
想得三更風露下醉和江月弄江烟

松上幽人圖

宋宗婦曹夫人仲婉  
所畫有曹道冲題詩

秋風謾謾松樹枝仙人骨輕雲一絲  
不飲不食玉雪安

竹宮月夕頻望祠竟不下視齋房芝人間女手乃得之  
眼中擾擾昨暮兒畫圖獨在義皇時予懷渺兮幽林思

戲題新居二十韻

去冬作舍誰資助縣侯雅以平原故賢郎檢視日復日  
規制從頭盡牢固南風一夕怪事發突兀赭垣殘半柱  
乞漿得酒過初望曲突徙薪忘後慮長淮千里燕巢林  
明月一枝烏遶樹東家老屋西北走衆木枝撐留少住  
由來馬隊非講肄況與羸牢通過路聚廬托處何暇擇

重為主人推獎悞夏秋之交十日陰抱被倚門愁旦暮  
問君新居在何許只去火餘纔數步學宮分地與閒冷  
使館有牆遮雜汙就中此宅尤費手官給工材半傭僱  
十寒一暴半載強纔得安牀置鐺釜紛紛暗被兒女笑  
老虎般彪今幾度胸中廣厦千萬間天地一身無着處  
北來衣冠日枯槁十九桃符傍門戶乾坤血肉得此身  
剩有把茅能勿懼上方下比良易見好惡且當隨所遇  
仰看片瓦聊自賀疾過巖牆寧反顧合歡明日招諸隣

狼籍盃盤從飽吐

贈蕭鍊師公弼

吾家阿京愛公弼  
吾家澤兄敬公弼  
半生夢與公弼游  
豈意相逢在今日  
春風和氣見眉宇  
玉壺冰鑑藏胸臆  
人間萬事君自知  
未必君材人盡識  
蘇門水木無纖埃  
聞君家近公和臺  
仙家近日多官府  
黃帽青鞋歸去來

時汰佛老家  
甚急故云

送弋唐佐董彥寬南歸

且為潞府  
諸公一笑



河汾續經名自重附會人嫌迫周孔史臣補傳久已出  
浮議至今猶洶洶薛收文志誰所傳貴甚竹書開汲冢  
沁州破後石故在為礎為砮吾亦恐暑涂十日來一觀  
面色為鰲足為腫淡公淡癖何所笑但笑弋卿堅又勇  
自言浪走固無益遠勝閉門親細冗摩挲石刻喜不勝  
忘却崎嶇在岡隴浴人本淡新有社淡事重重非一種  
有人六月訪琴材不為留難仍從吏懸知蠟本入渠手  
四座色揚神為竦他時記籍社中人流外更須增一董

蕭仲植長史齋

修武作

張顛飲豪傾四座脫帽狂呼誰敢和南宗北宗知幾人  
醉眼紛紛飛鳥過是公技進不名技元氣淋漓隨咳唾  
偶然捉筆本無意自有龍騰并虎卧當時誰有戰國策  
長史帖云借戰國策可付之凡七字門外雷車忽驚墮天星無數不知名  
色正芒寒纔七箇蕭郎家世陵谷後爭信空囊蓄奇貨  
蕭齋故事今復舉未怕秋風吹屋破護持有物世共喜  
不獨一時為子賀藏舟夜壑未厭深隄備有人來倚拖

送宋省參并寄潞府諸人

茅齋團團蝸殼大苦被傍人嘲塞破官家眼孔十萬緡  
未與書生供一唾長衫只辦包瘦骨故紙何緣變奇貨  
不因三致大耳兒老雪屯門甘凍卧國中腐鼠凡幾嚇  
玉上青蠅非一箇荆人美璞剛足招君足尚存乃可賀  
雲間太行青在眼上客歸來傾四座因君寄問社中人  
前日淡公行復過

覓神霄道士古銅爵

雷章著土紛朱碧秋菊春蒲人不識若非儀狄墓中來  
應自杜康祠下得古人我得酒之傳摸索飲器流饒涎  
巧偷豪奪吾何敢他日酬君九府錢

賦澤人郭唐臣所藏山谷洮石研

研有銘云王將軍為國開臨洮

有司歲饒可曾者六百鉅萬其於國中得用者此研材也研作壁水樣

舊聞鸚鵡曾化石不數礪鵲能瑩刀縣官歲費六百萬  
纔得此研來臨洮玄雲膚寸天下徧壁水直上文星高  
辭翰今誰江夏筆三錢無用試鷄毛

天井關

石磴盤盤積如鐵，牛領成創馬蹄穴。老天與世不相關，  
玄聖栖栖此迴轍。二十年前走大梁，當時塵土困名場。  
山頭千尺枯松樹，又見單車下太行。自笑道塗頭白了，  
依然直北有羊腸。

題商孟卿家明皇合曲圖

海棠一株春一國，燕燕鶯鶯作寒食。千古萬古開元日，  
三郎搦管仰面吹天公。大笑嗔不得，寧王天人玉不如。

番綽樂句不可無宮腰不按羽衣譜疾舞底用牧豬奴  
風聲水聲闕清都夢中令人羨華胥何時却竝宮牆聽  
恨不將身作李暮

贈答張教授仲文

秋燈搖搖風拂席夜聞歌聲無處覓疑作金荃怨曲蘭  
畹辭元是寒蟬月中泣世間刺繡多絕巧石竹殷紅土  
花碧窮愁入骨死不銷誰與渠儂洗寒乞東坡胸次丹  
青國天孫綠絲天女織倒鳳顛鸞金粟尺裁斷瓊綃三

萬足辛郎偷發金錦箱飛浸海東星斗溼醉中握手一

長嗟樂府數來今幾家剝借春風染華髮筆頭留看五

雲花

七言長詩於中獨一句九言  
韋郎有此例長吉亦有此例

### 馬嶺

仙人臺高鶴飛度錦繡堂傾去無路人言馬嶺差可行

比似黃榆猶坦步石門木落風颼颼僕夫衣單往南州

星落東南三百里鬢毛衰颯兩年秋

予去歲往河南遷  
奉亦取黃榆嶺路

瀝水

聞郎城張伯  
玉卦音作

灑水復灑水東望雁行沒殷勤一杯酒遙酌灑亭月裴  
回功名會脫落豪俠窟中州有士論指與雷李屈挂弓  
須扶桑洗劍必溟渤皇天靳美器一世惜英物神交付  
冥漠生氣凜毛髮古來天下馬萬里入超忽良樂不並  
世燕市空駿骨狂歌叫秋雲北風撼林樾

哭延孫

兒生去年冬閭里日相慶今年迫周晬疹痘俱已竟爛  
斑綴錦衫未與玉雪稱宅相望此孫惜愛均氣命一宵



誰奪去遠有亡辜橫情鍾本難忘力挽將安勝憶昔點  
粧初季女抱臨鏡灼灼芙蓉花澹與清波映霜風入芳  
渚瘦綠餘荷柄嬌紅耿在眼百喚不一應寂寞空鏡前  
老眼淚如迸



御訂全金詩增補中州集卷六十七

# 欽定四庫全書

集部

御訂全金詩增補中州集卷六十八

詳校官中書<sub>臣</sub>張虎拜

主事銜<sub>臣</sub>徐以坤覆勘

總校官編修<sub>臣</sub>王燕緒

校對官編修<sub>臣</sub>勵守謙

謄錄監生<sub>臣</sub>黃嘉績

欽定四庫全書

御訂全金詩增補中州集卷六十八

元好問六

劉遠筆

老腕力能舉玉杵  
文陣挽強猶百鈞  
惜哉變化太狡獪  
嚮也褐衣今虎文  
宣城諸葛寂無聞  
前後兩劉新策勲  
謝郎風神恨太雋  
雖然豈不超人羣  
三錢鷄毛吐皇墳  
尖奴定能張吾軍  
何時酌我百壺酒  
為汝醉草垂天雲

狡獪變化事  
見麻姑傳

贈周良老

于公斷獄多平反高門大車在乃孫我居聊城欲二載  
喜見周叟醇而溫十年大理書上考宜有陽報如于門  
大兒書來問安否兵饑不死天所存鄭孫毛骨殊秀發  
寶氣鬱鬱含朝暾機聲嘔啞聒朝昏種鉏五石當酒罇  
是翁福祿知未艾昆弟和樂連株根白髮阿兄應念我  
南雲寂寞賦招魂

鴻溝全欽叔賦

劉郎着手乾坤了未害與渠分九州夸兒衣繡自楚楚  
作計豈復西鴻溝雌雄自決已無策尺寸必爭唯上流  
韓生已死言猶在千載令人笑沐猴

雪中自洛陽還嵩山

道人薄有塵外緣迫入塵埃私自憐三十六峰一茅屋  
夢裏西家掠社錢津津喜色見睂宇戔戔青城當眼前  
蹇驢逕入風烟去恰是梅花欲雪天

祖唐臣愚菴

小智怯篋盜所羞大智移國鬼與讐浮生匹絹兩孟粥  
心計擾擾知何求青州荊州兔三窟古人今人貉一丘  
喚起羅池柳夫子與君同醉訾家洲

過井陘

北山亭亭如驛堠南山耿耿虎翹首土門東頭望井陘  
漢家風雲自奔走市人豈識英雄材金鼓一朝天上來  
此山行人萬萬古幾不磨滅隨蒿萊白鹿祠前一杯水

蒼顏聊為洗塵埃

北嶽

北鎮維嶽古帝孫太樸未散真巧存乾坤自有靈境在  
地位豈合他山尊中原旌旗白日暗上階樓觀蒼烟屯  
誰能借我兩黃鵠長袖一拂玄都門

智仲可月下彈琴圖

暮春舞雩鼓瑟希琴語解吐胸中竒誰言手揮七絃易  
大笑虎頭真絕癡北風蕭蕭路何永流波湯湯君自知



三尺絲桐儘堪老兒童休訝鶴書遲

常山姝生四十月能搦管作字筆意開廓有成人之量喜為賦詩使洛誦之

大兒小兒舞商羊東家西家捉迷藏牙牙作羣鴈鴈行是中乃有常山郎常山嬌嬌可憐蟲四歲未有三歲強黑鷹破殼自神駿黃犢放脚須跳梁只知見紙即塗抹誰謂轉腕能低昂渠家兩公破天荒劉煒夢靈果專場榮鄉亭中詩版在岐山名字香山香此郎晚出西樞房

虎穴虎子不可當天驚地怪見落筆便合抱送中書堂  
丈星煌煌照燕南青青子衿滿恒陽教官連被鳳尾諾  
瑞物多生金粟岡兒曹變化不作難何必二十始乖張  
明年作字一丈大當有稜角垂光芒回頭却看元叔綱  
鼻涕過口尺許長

常山白富齋第三子  
叔綱遺山之季子也

贈利州侯神童

生十四月識字子見時  
生二十一月識字無算

牙牙點妝杏蕾紅阿兄抱之來學宮今春學語語未正  
已能見書識名姓隨指隨讀無數重多生想曾大字中

極知之無不足訝更恐洛誦難為功土中松粒龍爪脫  
萬牛丘山起毫末君不見黃金寶鼎翡翠青未要春官  
許衣鉢人間失却麻神童明星煌煌出蒼龍只知江陵  
圖籍盡一火誰謂死草生華風遺山老子未老在見汝

吐焰如長虹

兒字  
金鼎

奚官牧馬圖息軒畫

曹韓畫樣出中秘燕市死骨空千金息軒筆底真龍出  
凡馬一空無古今安閒自與人意熟瀟灑更覺天機深

奚官有知應解笑世無坡仙誰賞音

紫微劉丈山水為濟川賦

畫家李范真勍敵方外只今誰第一自非劉宗祭酒阜  
昌孫未信仙翁輕落筆長洲遠浦各清冷萬頃風烟一  
草亭千章古木散巖谷鶴髮松姿餘典刑紙尾不須題  
姓字人人知是老人星

跋酒門限邵和卿醉歸圖

邵伯祿  
之父

邵公頭白甫三十高吟大醉無虛日風流若似靖南湖

每恨聞名不相識太平村落自由身童稚扶攜意更真  
醉歸圖上見顏色喜溢睂宇猶津津好着寒驢馱我去  
與君同醉杏園春

題張彥寶陵川西溪圖

松林蕭蕭映靈宇爍石流金不知暑太平散人江表來  
自訝清涼造仙府不到西溪四十年溪光林影想依然  
當時膝上王文度五字詩成衆口傳忽見畫圖疑是夢

而今塵土浣華顛

本送字今改作浣字陵川在太行之巔蓋天壤間清涼境界也江淮太平

散人題詩東廟自謂已造仙府恨居民不知其樂耳此  
縣先君子舊治宴遊西溪僕以童子侍馬彥寶出此圖  
求賦詩感今懷昔為之愴然故  
篇中有及癸丑十一月三日題

汝州倅韓君德華其十二世祖相遼封魯公故名  
其伯男子曰魯王父命氏古蓋有之予過其家命  
魯出拜為予言魯名矣而未有字敢以為請予字  
之世公德華曰願終教之乃申之以辭

昌黎諸韓散盧龍魯公相遼開邑封鴈行後先六侍中  
大參高文紀神功龜石穹窿與天終百年故家餘素風

汝州有子今成童考古制名龜筮從貴以道義飭汝躬  
良璞不治凡石同貞而絕俗孰子容濟質以文介而通  
顧雖宗起其起宗魯也不慚袁氏公

壬子冬至新軒張兄聖與求為兒子阿平制名子  
名之曰琥以仲耽字之小字明復有善禱之義焉  
詩不工當令阿耽灑落誦之

阿平玉雪絕可憐皎如鶴雛下青田呼來拜客挽不前  
啼聲如聞過秦篇陳王人門漢韋賢新軒文筆尤翩翩

大弔挂壁誰使然我知一經會有傳玄默之冬客須城  
問平之年纔五齡迺公為兒求制名兒名從虎玉與并  
仲耽為字以字行佛書舊說無空青豈知空青今有形  
紫公紫公還我明看兒著脚青雲平

送崔夢臣北上

并序

子貢挹闕買臣負薪朝奏暮召名動縉紳此有志  
之士所以自奮於昌辰者耶夢臣崔卿玉樹清姿  
土門華胄成童授學與鷄俱興肆筆成書倚馬可



待雖泌水之洋洋堪樂舜門之穆穆方開惜歲月  
之虛捐欲雲霄之坐致遇順風而縱大壑其孰禦  
之登金馬而上玉堂在此行矣詩以勸駕序寧闕  
乎癸丑二月望日新興元某序

并州書郎年少客細馬金鞭日三百生平意氣凌青雲  
未怕天山雪花白西園此日盛徐陳鳳閣鸞臺氣象新  
繇來草創資潤色況復天造須經綸他日南歸吾未老  
與君同醉晉溪春

送王彥華

中朝名勝龍山冀喜色門闢得佳壻一朝天府效驅馳  
萬里青雲在平地金粟岡頭俊造多莫從人品問如何  
迂齋受學青衿日珍重遺山為撫摩東國人倫吾豈敢  
只憑月旦決巍科

李成之王彥華趙孝先以提學命見餉佳酒且求  
制名輒以書記

子雲寂寞將誰親延之麤豪意自真君家公壻兩冰玉

酒味自合清而醇雲腴俗士無風神紅珠女兒茜裙新  
一杯香絕韻亦絕只今唯有醪醕春

劉時舉節制雲南

雲南山高去天尺漢家弦聲雷破壁九州之外更九州  
海色澄清映南極幽并豪俠喜功名咄嗟顧盼風雲生  
今年肘後印如斗過眼已覺烏蠻平諭蜀相如今老矣  
不妨銅柱有新名

贈張潤之

許年不唱龍津第人物尤難到衰世明堂他日要榱桷  
造物也須論蚤計晉人稟賦例真淳兒能讀書知養親  
遺山門客富儒雅綠髮張郎名姓新莫道琴工有師法  
海山深絕解移人

潤之資甚美故就其可致者而勉之  
他日學業有成老夫當以風鑒自負

矣

許道寧寒溪古木圖

為翟器  
之賦

道人醉袖蟠蛟龍埽出古木牙須雄開卷颯颯來陰風  
翟卿論畫凡馬空能知畫與詩同宗解衣盤礴非衆工

遺山筆頭有關全意匠已在風雲中留待他日不怠息

送張書記子益從嚴相北上

并序

子益省郎觀國之光從公於邁揚雄詞賦良借力於  
吹噓鄧禹功名本無心於祿仕詩以送別亦以趣其  
歸云

故家人物饒奇俊聳壑昂霄今已信康侯晝接拜寵光  
百里自應沾海潤六月貂裘風雪溲天河天駟日駸駸  
莫把聲華動臺閣東方書檄要陳琳

汾亭古意圖

堯民義皇去未遠日作日息天機全杜侯曲裏姑汾筆  
辦與南華談宵然廢興知經幾今昔淳朴別有一山川

白雲亭上秋風客不比仙翁甲子年

元祐以來郭熙明昌泰和間張公佐

皆年過八十而以山水擅名今雲中杜大革老與張郭年相若而畫品不下古人為侯廣道作汾亭古意橫披灑然有塵外意為題四韻其後神仙張果生帝堯甲子年詩家亦傳習用之故末句有及

換得雲臺帖喜而賦詩

周官武臣奉朝請劍佩束縛非天真世間曾有華陀帖

神物已化延平津  
米狂雄筆照萬古  
北宗草書纔九人  
今日雲臺見遺墨  
黃金牢鎖玉麒麟

過劉子中新居

鄆州城隅兩茅屋  
市聲喧喧自幽獨  
春風吹盡山杏花  
只有青青一叢竹  
先生愛畫如惜玉  
練鵲翔鸞餘百軸  
大兒踉蹌挾書歸  
土銚疎煙繞一粥  
微官枉負半生閒  
也著區區簿領間  
何時却與溪南老  
紫葢山前共往還

子中舊與溪南詩老  
辛敬之游故有下句

東湖次及之韻

西山山頭山月白倒影漣漪舞寒碧竹溪花鳥要君詩  
醉墨幾番枯研滴東湖佳處詩已盡矯首不知川路隔  
當年韓賈文章伯物色分留到佳客此州何必減蘇州  
頻有詩人來列職一時人境偶相值萬古風流餘此席  
三堂風月今猶昔擬拂塵纓問投跡因君寄詩使君公  
却恐他年厭求索

贈郝萬戶



阿卿袖中五色筆  
弦聲裂石雷  
破壁繡衣千騎東方來  
俊氣崢嶸蜀山碧  
詩書義府無古今  
祭遵軍中亦歌吟  
密侯勲業君自識  
計算不數韓淮陰  
莫看人柔待儒雅

朱輪畫轂見天心

鄧禹封  
高密侯

贈史子桓尋親之行

七十老親頭雪白  
滿意晨昏慰顏色  
兵塵瀕洞君不憂  
萬里天心不相隔  
八月秋霖九月霜  
破帽北風官路長  
瓜田故侯貧且病  
愛莫助之徒自傷  
後日書來聞吉語

通家猶得似南陽

送希顏赴召西臺兼簡李汾長源

昨日遊崧丘今日西臺行  
勞生好夢亦太少枕中馬嘶  
車鐸鳴山林之樂無虧成  
胡為解蘭縛塵纓蒼生望  
君須一起我知無地逃  
功名關中得君作金城  
氣象已覺西山平  
諸人誰出仲卿右  
一座想為相如傾  
風華浩蕩春冥冥  
馬頭仙掌遙相迎  
長安市上見李白  
為我一醉秦東亭

嵩山玉鏡

玉鏡見何許今日東山陞積雨洗昏霾旭日發光輝光  
輝奪人目灩灩如動移初如秋月圓漸如曙星微曙星  
不能久併與晨露稀此鏡何從來造化祕莫窺山精或  
寶氣恍惚令人疑誰為問岳祇山川英秀會有歸不能  
生申與甫瑞王國萬丈光芒徒爾為

飲酒

江南秋泉雲液濃遼東抹利玉汁鎔椰瓢朝傾荔枝綠

螺杯暮掩珍珠紅此酒誰所留今日乃汝逢仙人一丸  
藥洗我芥蒂胸金沙一散風雨疾世事盡與浮雲空東  
家劉伯倫西家王無功醉鄉日月萬萬古眼中擾擾誰  
為雄人會有歸盡飲不飲所同所恨獨醒人百年枯槁  
中獨醒恨未通獨醉恨未公安得清江變醇醑盡迴天  
地入春風

送高信卿

高卿去歲山中居橡朝栗暮分猿狙今年移家入城市

甌中生塵釜生魚丈窮智亦窮五鬼更嘯呼廼翁延客  
着上座兩兒已復遭揶揄三冬兔園冊牧豎叫語麤涇  
薪煙滿眼破硯冰生鬚賣符與行藥不養堂堂軀無衣  
思南州千里走單車我嘗相夫君不是山澤臞十八學  
擊劍二十了陰符平生結交王與李袖中頗有魚麗圖  
文武志膽誰不如不能拔劍斫蛟鱷亦當赤手降於菟  
胡為堅坐守寒饑坐令兒女悲窮途萬事糊塗酒一壺  
別時聊為鼓嚨胡中原麟鳳今如此莫道皇家結網疎

段志堅畫龍為劉鄧州賦

豬龍可豢亦可屠世人畫蛇復畫魚天飛忽入阿堅筆  
始覺衆史欺庸愚腥風萬里來白浪橫江湖一麾走海  
若再顧失天吳浩蕩明河翻尾鬣慘不濡只愁紙上出  
雷火搏控大千如此珠天生神物與化俱滅沒變見何  
所無逆鱗自古不受觸乃今縮頭隨卷舒怪得堂堂髯  
御史平生長有雨隨車

送詩人秦簡夫歸蘇墳別業

三月不見君渴心欲生塵論文一罇酒雅道誰當陳昨  
朝見君臨水句乃知抽青配白非詩人南山明月北山  
雲恨君不作由東隣擊鮮為具非無好事者天隨杞菊  
年年新石田茅屋連蘇墳兩兒力耕足養親君詩或者  
昌晚節不應道路長逡巡白髮刀騷一幅巾豐年鄉社  
樂閒身蹇驢馳入醉鄉去袖中知有睂山春

李參軍北上

五日過居庸十日渡桑乾受降城北幾千里出塞入塞

沙漫漫古來丈夫淚不灑別離間今朝送君行情深留  
餘潛生女莫作王昭君一去紫臺空佩環生男莫作班  
定遠萬里馳書望玉關我知驥子墮地無齊燕我知鴻  
鵠意氣青雲端草間尺鷃亦自樂扶搖直上何勞搏一  
衣敝緼袍一飽苜蓿盤歲時壽翁媪團圞有餘歡就令  
一朝便得八州督爭似彩衣起舞春爛斑去年雒陽人  
今年指天山地遠馬韉破霜重貂裘寒朔風浩浩來客  
子慘在顏扼胡嶺上一回首未必君心如石頑君不見



垣山鳥乳哺不得須臾閒衆雛一朝散孤雌四顧聲悲  
酸寒鴈來時八九月白頭阿母望君還

賦邢州鵲山

去時唐山道望望鵲山背今朝西北看奇秀益可愛蒼  
茫失層疊解駁見縈帶浮雲自來去盡巧寧變壞吳妝  
入小筆隱隱拂殘黛城隅靜女人不知擁髻低顰如有  
待太行橫截九州半一崦一重俱有態只知天平六峯  
天下稀比山東來亦閒在煙埋雨沒今幾時殆天所藏

予發之郭熙未足語平遠摹寫惟有韋郎詩

送王亞夫舉家歸許昌

一日兩食藜藿葵三冬一褐骭與齊監河貸粟困欲死  
望望江水湔塵泥故書一束手自攜汴兒跳梁翠女啼  
出門疾走勿反顧正恐五鬼從之西馬中豈是無龍媒  
世人徒知牝牡黃與驪只如黃金絡頭亦不惡誰謂茅  
索能相羈天公醉著百不問汝偶而偶奇而奇前途兀  
兀黑於漆昨日把笏今扶犁乃知世間倚伏不可料井

底容有青雲梯春風兩淮多輦鼓軍中少年舞荒鷄因  
君南望一大笑落日澹澹青山低

醉後走筆

建茶三盃冰雪香離騷九歌日月光腰金更騎揚州鶴  
雋永不羨太官羊短燈檠子移近牀秋風吹簾月轉廊  
一歌再歌魂魄動入眼渺渺橫沅湘湘妃漸遠望不及  
金夫翠蕤澹飛颺漁父話獨醒孺子歌滄浪山鬼獨一  
脚撫掌笑我傍湘纍歸來弔故國遺臺老樹山蒼蒼掩

書一太息夜如何其夜未央東家女兒繡羅裳銀瓶瀉  
酒勸客嘗一酌均跼顏再酌齊彭殤宇宙不今古氣節  
無陰陽少年避酒不肯喫跬步乃有無何鄉愛茶愛書  
死不徹乃以冰炭貯我腸世間唯有麴生風味不可忘

南湖先生雪景乘驪圖

并序

南湖先生原武人年二十許時曾以鄉賦兩魁鄭州  
然其資侗儻所以自望者甚高終不樂為舉子計即  
棄去學擊刺當正隆征南頗欲馳逐戎行間旣而大

定詔書下兵各罷歸先生抱利器而無所試乃浮湛里社以詩酒自娛買田南湖之上築亭種樹徜徉於其間盡置家事日與賓客酣飲歌管棊槩窮日夕不少休家故饒財又好施予其赴人之急猶疾痛之在已故人尤以此歸之所與游如臨洺王逸賓游宗之大定劉之昂其人皆天下名士至論人物必曰靖達卿今日之奇男子也先生生於天會初歷大定明昌泰和優游於太平和樂之世者五十年太安兵興乃

下世生平喜作詩樂府尤有蘊藉觀西子棄瓢詩可  
見也髮鬢蕭颯荇羅秋千古香溪水自流吳越兵爭  
竟何得風流輸與五湖舟嘗雪中騎青驪行京水道  
中作長詩卒章有安得西都畫史吮筆出新意寫作  
南湖老子雪景乘驪圖之句其子文煒北渡後來東  
平始以先生之意追畫此圖求僕賦詩文煒質直好  
義讀書作文有聲時輩中觀其子可以想見先生之  
為人故為道其事并以致懷賢之思

大河茫茫白連空寒雲迢迢度南鴻汴梁高樓管絃裏  
成羣行人西北風北風吹雪來飄瞥捲孤蓬異色變慘  
澹元氣開洪濛襄陽潮陽詩境在掇拾物色真難工青  
騾誰此游望見知是南湖翁南湖翁少日骯髒今龍鍾  
猶能吐氣萬丈如長虹閉門兀坐意不愜要看銀海翻  
魚龍寶花世界瓊瑤宮江山隨翁入清雄詩成仰天一  
大笑飛花落絮春濛濛鬱鬱梁宋郊翁家出強宗許與  
必豪右收去聲入等侯封翁年十八九弄筆學雕蟲疊取

兩解魁隱隱何隆隆一旦拂衣去學劍事猿公正隆適  
南征疋馬走從戎墨丸磨楯鼻意與江流東紫微出東  
方淮海亦來同都將書與劍田間就春農仕宦不作邴  
曼容醉鄉自愛王無功鷄鵠從渠致鐘鼓野鶴豈合棲  
樊籠南湖煙景多魚鳥亦從容亦有兩小船綸竿插船  
篷高亭出秀樾窓戶連青紅颺隨睡輿瞑色赴吟筇  
門前車馬來日釀日不供但苦佳客少焉知清興終看  
翁棄瓢詩調戲鴟夷老子如兒童雄吞已覺雲夢小寒



縮寧作書生窮當年我得奉談笑晝夜肯放清罇空東  
家西家不相從南海北海不相逢風流耆舊今誰似惆  
悵相看是畫中

癸卯歲杏花

南州景氣暖杏花間紅梅讀書山前二月尾向陽杏花  
全未開待開竟不開怕寒貪睡喚人催愛花被花惱不  
徹一日遶樹空千回牙牙嬌語山櫻破稠爛成團稀作  
顆小蕾從教絳蠟封繁枝未要晴雲裏兩月不舉酒半

歲不作詩更教古銅瓶子無一枝綠陰青子長相思今年閏年好寒節花開不妨遲一月

留船買魚作寒節亦方舟先生李知幾語

贈答趙仁甫

仁甫名復雲夢人江表奇士也

我友高御史愛君曠以真昨朝識君面所見勝所聞江國辭客多玉骨無泥塵軒昂見野鶴過眼無鷄羣想君夜醉潯陽時明月對影成三人散著紫綺裘草裏烏紗巾浩歌魚龍舞水伯不敢嗔何意醉夢間失脚墮燕秦萬世一旦暮萬里猶比隣世無魯連子黑頭萬蟻徒紛

紛君居南海我北海握手一杯情更親  
老來詩筆不復神因君兩詩發興新都門  
回望一大笑袖中知有江南春

嘯臺感遇

徘徊五巖上浩歌彌激烈望望蟾房翁  
倒影乍明滅地古足靈異祠廢餘像設  
子規夜啼山竹裂老鶴亂踏枯松折  
嘯臺音響杳不聞蕩蕩青天一明月  
荒山破瓦色十步九窪疊水泉出沮洳  
一綫僅不絕翁乎何意留此

居可是他山無地穴大道既下衰日鑿聰明開玉從珪  
璋毀木以青黃災天和散不留去浪無東回咄咄此老  
蒼駝麟作怪魁堯年生甲子含德如未孩標枝野鹿致  
足樂火食屋居良所哀史筆亦厚誣何嘗校計識與材  
纏身正有一丈髮直以何物觀形骸大笑黃冠師金丹  
羽化之說何從來豈知大人先生獨立萬物表太古元  
氣同胚胎不見今日孫公和橫絕四海隘九垓嵇康養  
生安在哉

水簾記異

癸卯九月四日  
同杜仲梁賦

黃華絕境探未窮道人曾約山櫻紅鏡臺懸流不易得  
世俗名取香爐峰七年長路今一到刺鯁欲滿平生胸  
豈知旱久泉脉絕快意一濯無由供神明自足還舊觀  
漫浪爭敢傲靈通何因狡獪出變化勝槩轉盼增清雄  
天孫機絲拂夜月佛界珠網搖秋風稱奇叫絕喜欲舞  
恨不百繞青芙蓉銀橋清涼巔玉鏡崧丘東世外果無  
物邂逅乃一逢書生眼孔塞易破勺水已復誇神功東

坡撫掌應大笑不見蟄窟鞭魚龍

硤谷聖燈

九月五日作

金門寺前山突起井底寶巖三十里舊聞聖燈在山上  
紫微侍郎宜不妄山空月黑無人聲林間宿鳥時一鳴  
游人燒香仰天立不覺紫煙峯頭一燈出一燈一燈續  
一燈山僧失喜見未曾金繩脫串珠散迸玉丸走杵光  
不定飛行起伏誰控搏華麗清圓自殊勝北荒燭龍開  
晦冥南極入地多異星豈知心光毫相有真遇物外恍

惚終難憑腐儒心魄為動蕩再拜中庭謝靈貺何曾辦  
作劉更生下照乃辱青藜杖昨朝黃華瀑流神所憐今  
朝金門佛燈佛作緣紛紛世議何足道盡付馬耳春風  
前

食榆莢

露葵滑寒羊蕨羶春榆作莢絕可憐榆令人瞑何暇計  
田舍年例須濃煎簫聲吹暖賣錫天家人鑽火分青烟  
長鉤矮籃走童稚頃刻綠萍堆滿前炊飯雲子白剪韭

青玉圓一杯香美薦新味何必烹龍魚鳳誇肥鮮鼠肝  
蟲臂萬化途神奇腐朽相推遷夢中鸚鵡亦大樂隨意  
飲啄真飛仙先生捫腹一莞然此日何功食萬錢

李峪園亭看雨

龍山右脇松十里細路蜿蜒繞龍尾松林迫塞悶煞渠  
北望玉泉疑井底玉泉元自別一天眼界廓廓無神川  
金城百里纔一俯半尖浮圖插蒼煙行行下絕巘招提  
忽當眼未到倦不勝小憩遂忘返玉泉一杯甘以冽未



須張陸誇冰雪主人不在客不留烈風崖下風颼颼石  
頭路滑馬蹄怯山雨未落雲先愁將軍林園永安下秋  
霽村墟絕蕭灑濃雲壓屋風打頭僅得羈銜脫疲馬只  
知龍山之神神更神永安亦能撼詩人晦冥變化千萬  
態畫出風雨元非真山靈亦愁歸後夜半面時時見雲  
罇天瓢細灑供晚涼不似草堂迴俗駕層陰一掃羣峰  
出一洗深青徹山骨夕陽展放紫翠屏只欠松梢一輪  
月中一石迴萬年況是一壑復一丘不如一詩招將

入南州先生興來時卧遊

醉中送陳季淵

寒食不數日天氣殊未佳翩翩金門客行行指龍沙朝  
發忻城暮隴頭隴頭地寒無草芽拂雲堆邊春更晚雪  
花茫茫揚白沙紇干山高凍殺雀榆葉離離小藪薄愛  
君只欲苦死留不道南飛何所樂書生弓馬能幾何乃  
今寶鉸金盤陀孔璋文筆妙天下敕勒不數陰山歌向  
年賦奇雨擁海驅雲筆頭注快如懷素書布障狂笑劉

又寫冰柱李汾王鬱俱灰塵天意乃在潞陽陳舌吐萬  
里唾一世眼高四海空無人殘民假息仍瘡痍誰作東  
山謝安起恨我不比長桑君一月觴君上池水眼中之  
人不易忘誰作冰炭置我腸衰顏明鏡兩寂寞別意春  
江誰短長但願年年見顏色與君連日醉壺觴

送弋唐佐還平陽

我從商餘之山過菴羅聞君六經百家富研摩荃蘭為  
佩冠巍峩豈肯俯首春官科覃懷變生十載後我時避

兵方北走通家弋宋共有無行輩許之為老友晉州一  
書君肯來握手大笑心顏開春風着人不覺醉快卷更  
須三百杯鶴骨騫飛法當壽況是丹房藥鏡留心久崑  
崙神泉浸术芝乞與餘膏潤衰朽天府學士登瀛洲松  
頂仙人垂直鉤愛君直欲抵死留自言世事非所求千  
古黃金鑛中淚不獨盧仝并馬異蘇州韋郎交分深香  
山白傅金玉音借渠兩詩寫我心相知非不多但苦心  
不同同心一人去坐覺長安空離愁何從生生從情愛中

不見行路人拂袖自西東  
汾流滔滔今日千里青眼高

歌吾老矣

寶豐山中有菴羅寺唐佐嘗從程內翰天益問學於此

付阿耽誦

昨得商子書知有阿耽名  
今朝見阿耽驚喜喜復驚  
迺翁雅望傾漢廷仕才千石埋九京  
我知渠孫不虛生虎穴生虎子  
墮地骨骼成舉頭為城尾為旌  
幾人雄猛得寧馨繡衣青春佳  
御史路人望見行且止老夫從旁當  
說似前日晦道堂前小兒子雷動風行自應耳  
恭藹不

采今其始

為程孫中鄉作

繡褥錦為欄  
蘭湯金作盆  
名駒出洼水  
萬馬浮雲奔  
參軍愛友親  
弟昆御史風  
節海內聞  
諸郎楚楚皆  
玉立王謝  
定自超人羣  
高樹出大根  
源清流不渾  
千年雒陽陌  
赫赫于公門  
外翁老住山  
村正要兒童  
侍酒樽他日  
新詩一千首  
不愁無物餉  
吾孫

湘中詠

楚山鶴鳴風雨秋  
楚岸猿啼送客舟  
江山萬古騷人國  
猿鳥無情也解愁  
西北長安遠於日  
憑君休上岳陽樓

洧川行

洧川道邊日欲西  
誰家少婦掩面啼  
漫漫長路行不徹  
粉綿鏡衣手自攜  
自言娼家女家在  
梁門東夫婿輕薄  
兒新人不相容憶  
初在家時只辦放  
嬌慵爺娘惜女如  
惜玉近前細看面  
發紅無端嫁作蕩  
子婦流落棄擲風  
埃中可憐桃李花  
顏色嬌蒙茸朝看  
華枝好暮看華枝

空安得明珠三百斛重簾複幕圍春風

幽蘭

僊人來從舜九疑辛夷為車桂作旂疏麻導前杜若隨  
披猖芙蓉散江離南山之陽草木腓澗岡重複人迹稀  
蒼崖出泉懸素霓條然獨立風吹衣問何為來有所期  
歲云暮矣胡不歸釣天帝居清且夷瑤林玉樹生光輝  
自棄中野誰當知霰雪慘慘清入肌寸根如山不可移  
雙麋不返夷叔饑飲芳食菲尚庶幾西山高高空蕨薇



露繁無人薦湘累山鬼切切雲間悲空山月出夜星微  
時有彩鳳來雙棲

怒虎行

答宋文之

怒虎當道臥百里不敢唾紛紛射彪手一見弧矢墮誰  
知世有李將軍霹靂弦聲驚石破昨日雙南金今日綠  
綺琴贈君無別物唯有百年心

梅華

去歲梅華晚今歲梅華早和羹要佳實春風莫草草

寶鏡

寶鏡挂秋水青蛾紅粉妝春風不相識白地斷肝腸

惡雨

惡雨惡復惡龍公何遽然霆轟冰塔碎電掣玉繩連高  
岸皆深谷層霄一漏泉黑來疑擁海白散忽成烟市響  
千門合潮頭萬弩穿天瓢休盡建上聲枯旱有他年

綦威卿殺挽辭

東海于門舊桐鄉邑墓遷

綦東海人威卿之祖侍制公知忻州因家焉芝蘭

宜有種珠玉自成淵慈母依隣切名郎獲譽先豪華非  
日損信厚出天然詣理言猶訥持心靜益專笑談千里  
到咳唾百金捐論齒推予長垂髻得子賢通家仍孔李  
知己與王田刻責誰斯切推扶最所偏孤嫠平日託昆  
季再生緣推割詩寧寫精微夢或傳都將百年淚一慟  
夜臺前

贈祖唐臣

誰道壞復壞知言能幾人陵夷隨世變巧偽失天真鬼

域姦無盡優伶伎畢陳  
訪傷應皆裂淫褻亦肌淪  
珉玉何曾辨風花祇自新  
憐君用幽意老矣欲誰親

月觀追和鄧州相公席上韻

月觀知名舊池亭發興偏  
露涼驚夜鶴風細咽秋蟬  
綠泛兵厨酒紅依幕府蓮  
無緣逐清景空羨飲中仙

方城道中懷山中幽居

扶拙違時用年饑與食謀  
江山貧士嘆日月賈胡留  
楚客頻招隱文園故倦游  
衡門有幽事還我北窓秋

孟州夾灘飲承之御史家

同欽叔作

美酒禁愁得芳梅發興饒紛紜聊且置  
魄磊故須澆鷄

黍成前約干戈有此宵平生楊大理惜不預佳招雲卿

赴召

五日矣

寄贈龐漢茂弘

之子貧居久詩文日有功苦心唯我見高誼許誰同  
萬里虎食肉一鳴雞長雄皇天老眼在且莫怨丘中

洛陽古城曦陽門早出

乘月出曦陽黎明轉北岡荒村自鷄犬長路足豺狼天  
地憐飄泊風霜憶閉藏微吟許行役淒斷不成章

聞希顏得英府記室

近得髯參信知從兔苑游文星映朱邸勝槩減黃樓進  
退存中道功名接上流徒懷貢公喜塵土隔瀛洲

得姪搏信二首

今日鄜州姪知從虎穴還百年陰德在幾日鬚毛斑隔  
濶家仍遠羈縻食更艱誰憐西北夢依舊遶秦關

號驛傳家信  
坤牛玩吉占  
團圓知有望  
悲喜亦相兼  
過眼書重展  
伸眉酒屢添  
關河動高興  
百遶望清蟾

阿千始生

四十舉兒子  
提孩聊自誇  
夢驚松出笋  
兆應竹生花  
田不求千畝  
書先備五車  
野夫詩有學  
他日看傳家

長壽新居二首

同仲經賦

隱去心初在  
親朋復此偕  
荒田歸別業  
高樹表新齋  
泉石深三逕  
風塵限兩崖  
青山坐終日  
無物寄幽懷

昔有姜夫子來家寂寞濱墓田耕已熟碑石字猶新詩

酒娛中歲山林有外臣三生可信否吾亦寄前身

宣和中姜

夢得處士常隱于此墓碣在焉夢得曾上書仁宗既老以詩酒自娛碣文說地名白鹿原長壽村也

### 少林雨中

西堂三日雨氣節變蕭森偃臥復歌臥長吟時短吟鐘  
魚四山靜松竹一燈深重美禪棲客都無塵慮侵

### 得一飛姪安信

音問他鄉隔存亡此日知夢中憂凍餒意外脫艱危避



地何嗟及還家敢恨遲衰年吾事了似有鹿門期

送母受益自潞府歸崧山

薄俗科名賤孤生志願違正須謀獨往何暇計羣飛  
泌水真堪樂荊州況可依青山吾舊隱此日羨君歸

寄程孫鐵安

御史陰功在孫兒玉不如已能騎竹馬想亦愛銀魚  
異縣關山潤衡門骨肉疎幾時隨阿舅盡讀外家書

贈汴禪師

道重疑高謬，禪枯耐寂寥。  
葢頭茅一把，繞腹篋三條。  
趙子曾相問，馮公每見招。  
風波門外客，無事且相饒。

己亥元日

五十未全老，衰容新又新。  
漸稀頭上髮，別換鏡中人。  
野史纔張本，山堂未買隣。  
不成騎瘦馬，還更入紅塵。

發濟源

早暎今年劇，他鄉底處歸。  
羸糧失先具，涉世本無機。  
棄擲烏皮几，徘徊白版扉。  
殷勤雙語燕，婉汝遠相依。

答潞人李唐佐贈詩

聞道嗟予晚求師愧子賢泥途終自拔璞玉豈虛捐書  
破三千牘詩論二百年文章有聖處正脉要人傳

懷粹中

醉解不復寐吟君田舍詩從知石門老未比木菴師日  
月淹書尺江山入鬢絲何因重談笑却似少林時

同周帥夢卿崔振之遊七巖

定襄七巖

客路頻年別僧居半日間同遊盡親舊舉目是家山世

事風塵外詩情水石間悠然一樽酒落景未知還

送崔振之迎家汴梁

老伴不易得殘年唯有閒桑麻一村落鷄犬兩柴關樊  
守能供酒周侯許買山從今釣溪上日日望君還

續陽平十愛

我愛陽平酒兵厨釀去新百金難着價一醅即醺人色

笑榴花重香兼竹葉醇為君留故事喚作杏園春

杏園  
指紀

子正家  
園為言

送田益之從周帥西上

市近厨無肉書香寮有蟲深居誰不樂

去聲

兀坐竟何功

天日伸眉後江山洗眼中蓬萊如可到剩借玉川風

所有

謂

十月四日往闕南

短日晨光澹高風宿靄澄山寒渾欲雪水涸劣能冰振

厲時何有躋攀倦不勝哦詩聊自遣松液已香凝

子方  
釀松

醪當以今日  
熟故及之

寄王丈德新二首

德新時在汝州

沙際春還去，雲頭雨不成。興來誰共醉，事往獨含情。  
紫邏留行客，黃流隔戍城。岸花何處在，空憶棹歌聲。

在孟津時

事

清汝風華地，平生記此游。酒能千日醉，春必萬金酬。  
攬鏡非遲暮，逢花儘滯留。只應歌笑處，偏欠李鄜州。

欽叔時赴

鄜州幕官

舊國

舊國分崩久孤兒展省初客衣留手綫驛傳失肩輿夢  
拜悲兼喜心飛疾亦徐殷勤南去鴈先為到商於

甲辰夏五月積雨十餘日不止遣悶二首

甲子霖霖雨巡簷悶不禁幻泡成寶相水樂激哀音瘴  
海聞天漏堯年見陸沈騫飛想雲表癡坐若為心

甲子霖霖雨農郊搏手空排牆寧有禮為壑竟何功戰  
蟻侯王上鳴蛙意氣中掃晴應曉夕少忍待秋風

排牆  
事見

王衍論云排牆  
之壓猶有為耳

陽泉樓雲道院

方外復方外，儵然心迹清。  
開窓納山影，推枕得溪聲。  
川路遠誰到，石田平可耕。  
霜林不嫌客，留看錦嶂嶒。

劉子中夢菴

寤寐生與死，幻歟為是真。  
如何夢中境，不屬覺時人。  
朝徹從渠夜形開，亦此神殷勤。  
花上蝶分我，漆園春。

丙午九日詠菊二首

秋菊有何好，秣緣風露清。  
花中誰比數，霜後獨鮮明。  
九



日惜虛過一樽還自傾今年病居士吟遶更關情

几案得新供小窓幽更宜風霜寧小怯根撥要深移黃  
素金行正芳甘藥品奇三薰復三沐歲晏與君期

酬中條李隱君邦彥

川路限南北相逢今白頭蟲沙非故國人物自名流學

道慚高步留詩惜暗投歸秦如有便終伴竹林游

邦彥自闕

中徒步省其季父於  
集寧故有竹林之句

送邦彥北行

比數推前輩陪從結後緣川涂即睽隔詩酒重留連白

鶴歸華表青牛得老仙秦山好行脚倚杖待明年

紫微劉丈

雅有游秦之興  
故篇中有及

### 壬子月夕

明月復明月今年還遠遊關河動歸興時節重離憂老  
眼耿無寐病身偏覺秋遙憐小兒女把酒望東州

### 七月十六日送馮楊善提領關中三教

為愛秦中好西遊日苦遲青雲動高興白首得新知道

在貧何病官閒老更宜相思詩酒社無計與追隨

京兆漕司官居三首

符節推通貴江山入勝游名園隨地改高棟與雲浮簿  
領歸閒暇鶯花入唱酬不知秋夜月何似庾公樓

複嶺雲橫野孤峯玉柱天遙知開館日別破見山錢夢  
出紛華外詩來寂寞邊亭中誰舉酒高興想悠然

聞說梅軒好長吟有所思入簷看瘦影挂月見橫枝東  
閣今千載風流彼一時西遊會有約到日更題詩

甲寅正月二十三日故闕道中三首

雪碓不得過陽陂如見留林煙常暗澹木葉自颼颼齒  
髮悲行役鶯花惜舊遊塵埃與風雨看待幾時休

千里不易到三冬須少留居情猶晉產去意已雕丘遠  
出每為苦雄誇還自羞君心未肯在應待肯時休

六十復半十年年添白頭祇知詩遣興未覺酒忘憂人  
七因循過元宵塊坐休殷勤行記上今日是東州

送閻子實焦和之北上

秦府賢初聚瀛洲路不遙謨謀在廊廟物色到漁樵布  
褐豈終隱旌車行見招春風兩黃鵠老眼看雲霄

庫城

浩浩庫城水岸高知幾尋疎林護懸險絕壁入清深跼  
步無曠迹勞歌惟苦音年年一來此老我亦何心

婁生北上

并府虛荒久大城如廢村草茅知世故泉壤隔天闕六  
月甘霖決一言陰理存明年佩符節知有奉春孫

遣興

几案滿書史欣然忘百憂一篇詩遣興三醖酒扶頭千  
載陶元亮平生馬少遊但留強健在老矣復何求

示白誠甫

之子吟爆竹廼翁欣樹萱崑山多美玉江水發初源名  
教有樂地詩書皆雅言通家吾未老倚杖望高軒

送文生西行

今夜東山月隨人知幾程從軍少年事分手故鄉情渭

水風露早秦川煙樹平相招有仙掌無計與君行

挽趙參謀二首

偃息參戎幕敦龐一褐寬儒宮親俎豆賓榻老衣冠石

動心寧轉河清笑自難殷勤題畫像留與後生看

一作留

典刑  
看

篇什中州選兵間僅補完風人定誰采墨本賴君刊雅  
道湮沉易幽光發越難高門有孫息玉立看儒冠

答弋唐佐

遭亂無安地分憂得若人鄉隣存世譜骨肉到情親窈  
默餘天粹咀嚙有道真懷哉沂水上同詠舞雩春

嗣侯大總管哀挽二首

北俗資財勁將軍迴不羣賓筵推雅量戰艦望奇勲運  
隔黃圖日神馳紫塞雲祇應吳季子撫樹惜徐君

倚伏難前料乘除忌蚤成老親如宿昔世爵見哀榮劍  
鬱雙龍氣碑留九虎名感歌凡幾解千載賁佳城

不寐



不寐復不寐悲吟如自讐雞棲因失曉蟲語苦爭秋日  
月虛行素風霜入敝裘誰憐庾開府直欲賦澆愁

送楊叔能東之相下

海內梅司戶聲名三十秋文高徒自苦食盡與誰謀老  
檜風霜飽芳蘭澗壑幽東游無可慮敬客有蕭侯

御訂全金詩增補中州集卷六十八